

DISSERTATIO INAUGVRALIS MEDICA,

DE FEBRIBVS INTERMITTENTIBVS IN PRÆSENTI ANNO EPIDEMICE GRASSANTIBVS;

QVAM

DEO T. O. M. DVCE ET AVSPICE,
RECTORE VNIVERSITATIS MAGNIFICO,
REVERENDISSIMO ET AMPLISSIMO DOMINO,

DN. PLACIDO,

REGALIS MONASTERII S. S. APOSTOLORVM PETRI ET PAVLI ORD. S.
BENEDICTI INTRA ERFORDIAM ABBATE, PRÆPOSITVRÆ ZELLENSIS
ET IN FRANCKERODA AD VVERKHAM DOMINO, S. FACVLT.
THEOLOG. ASSESSORE PRIMARO, ETC.

AVTORITATE ET DECRETO GRATIOSÆ FACVLTATIS
MEDICÆ IN PER-ANTIQA HIERANA,
SVB PRÆSIDIO

LAUDATISSIMI ORDINIS MEDICI DOMINI DECANI ET SENIORIS

DN. D. JOH. ANDREÆ FISCHERI,

CONSIL. ET ARCHIATR. ELECT. MOGVNT. PATHOLOG. ATQVE PRAX. PROF.
PVBL. PRIM. NEC NON MED. PROVINC. DVCAL. ISENAC.

PATRONI AC PROMOTORIS SVI COLENDISSIMI,
PRO LICENTIA

SVMMOS IN ARTE MEDICA HONORES AC PRIVILE-
GIA DOCTORALIA RITE OBTINENDI,

PVBLICÆ ERVDITORVM CENSVRÆ SVBMITTIT
AVTOR ET RESPONDENS

MAXIMILIANVS FLORVS ERSFELDT,

Wedano-Runkaliensis,

IN AVDITORIO MAIORI COLLEGII MAJORIS, HORIS CONSVETIS.

DIE V. JVLII, A. R. S. M DCC XXVIII.

ERFORDIÆ, Typis GROSCHIANIS, Acad. Typogr.

**ILLVSTRISSIMO ATQVE EXCELLEN-
TISSIMO DOMINO,**

D O M I N O

**JOH. LVDOVICO
ADOLPHO,**

S. R. I.

COMITI DE WIEDT,

**DOMINO RUNKALIÆ ET ISSEN-
BURGI,**


PATRIÆ PATRI O. M.

**COMITI AC DOMINO SVO
PER QVAM CLEMENTI,**

Levem huncce laborem Academicum, in monumentum
perenne subjectissimi cultus, & submissam sui stu-
diorumque commendationem, cum perpetuæ fe-
licitatis sanitatisque voto pio, humillima observan-
tia & debita submissione

consecrat atque dedicat.

AVTOR.



PROÆMIUM.



Omne equidem in omni animantium genere & grege nil unquam dignius, nilque nobilius, sed insimul quoque nil infelicius ac miserabilius in hac rerum universitate vidit veneranda Antiquitas, videbitque sera nostra posteritas. Licet enim inter creaturas hujus orbis

animatas, ex divino mandato ac jussu, primatum teneat, illasque singulas non solum formosissimâ corporis structurâ, sed & inprimis generoso mentis acumine & sagacis rationis præstantia, longe superet, sæpius tamen, ob causas ut plurimum levissimas, utriusque hujus doni jacturam patitur, ubi tanta morborum phalanx, tot symptomatum myriades quotidie densò ipsum circumstant agmine, omnemque simul movent lapidem, ut ex prospero tali statu eum dejiciant, ac veram miseriæ trutinam, morborum ludibrium, mortisque tandem victimam ex eo efficiant. Hinc nihil sanè in rerum natura offendes, à quo corpus nostrum non impetitur, laceratur, convellitur, discruciatur; Cælum & sidera, elementa ad unum omnia,

omnia, quin ipsa etiam alimenta & potulenta, fragilem ejusdem mixtionem cæteroquin sustentantia, miro prorsus modo in extremam ejus perniciem conspirant, sicque ea fere omnia, quæ infelicem talem machinam vel produxerunt, vel ad extruendam illam quicquam opis contulerunt, tandem quoque eandem iterum destruunt, corrumpunt, dissolvunt. Aer enim sævo procellarum stridore, turbidis horridisque tempestatum mutationibus, densissimarum ac foetidissimarum nebularum caligine, insolito calore aut rigido & boreali frigore; Terra cavernosis & vastissimis hiatibus, profundis voraginibus & terrificis speluncis, nil nisi pestiferum, putridum & quasi stygium aerem evomentibus; Ignis, inprimis subterraneus, clandestinis materiarum sulphureo-nitroso-arsenicalium incendiis & hinc dependentibus perniciosissimis exhalationibus & aeris infectionibus; Aqua tandem inundationibus aut collectionibus insolitis, stagna, lacus & paludes undiquaque efformantibus & vapores postmodum adversissimos emittentibus, ordinarie innumeris modis integritati & sanitati animalis nostræ œconomiae insidiantur, eique certissimam perniciem minantur.

Ast hæc omnia, licet fontica satis admodumque gravia existant, vix tamen satis malorum in genus humanum conferre à plerisque æstimantur; hinc homines ipsi, quod invitus dico, ultrò nefando prorsus modo in proprium sæviunt corpus, illudque utpote per se jam satis debile & invalidum, vesanis libidinibus, diurnis & nocturnis commensationibus aliisque pluribus turpissimis vitiis, usque adeo concutiunt, ut tandem necessario in omne genus morborum præcipitetur, quos quidem speciatim jam recensere nec instituti ratio, nec chartæ angustia permittit; unicam autem & quidem frequen-

quentissimam quandam speciem, quæ ut plurimum genuina intemperantiæ soboles est, Febres nimirum intermittentes, exempli loco adduxisse sufficiet; hæ enim, quoniam vernali hætenus tempore ob perturbatam forsitan victus rationem admodum frequentes extitere, & ob aeris ac tempestatis singularem constitutionem pravam, insimul epidemicè affligerunt, quin imò adhuc grassantur, dignæ utique mihi visæ sunt, ut loco speciminis inauguralis paulò diffusiori stylo explanatæ sistantur. Annuat igitur divinum Numen huic proposito, ut omnia feliciter & ex voto eveniant!

SECTIO I. HISTORIAM HARVM FEBRIVM TRADIT.

§. I.

Hætenus equidem *Febres intermittentes* cujusvis speciei multi attente non minus quam curiose considerarunt & explicarunt; ast, quoniam haud raro exercitatisimi etiam Practici, ob nimis mutabilem illarum indolem, & admodum variabilem symptomatum in iis occurrentium conditionem, nec non medicamentorum tunc propinatorum modo admodum debilem, modo prorsus irregularem operationem, sæpissime in labyrinthum fere inextricabilem inducuntur, quaque ratione tandem ex angustiis istis se explicare debeant, haud invenire possunt, quale quid inprimis tunc contingit, quando ejusmodi febres ad indolem *malignarum* paulo propius accedunt, aut ad minimum

larvam talium præ se ferunt, atque *epidemice* grassando, multos non solum uno eodemque tempore invadunt homines, sed & ob connexa, quæ illas ordinarie comitantur, insolita pathemata, in plurimis si non lethalem, saltem valde periculosum & tædiosum sortiuntur exitum; hinc minime injuste me facturum esse arbitror, si hoc præprimis tempore, quo tales intermittentes febres ob *epidemicam* ejusmodi grassationem diversis regionibus & civitatibus molestiores evadere siverunt, paulo intimius in illarum indolem & genium inquirere annitar, demonstraturus nempe, qua ratione ordinarie subjecta ista affligant, qualemque sub his circumstantiis tractationem therapeuticaam admittant vel respuant.

§. II.

Quod enim in urbis incendio de jure fieri debet, ipsaque necessitas per se requirit, ut ad extinguendum ignem omnes concurrant cives, atque unitis viribus præsentī tali periculo se se opponant; illud sane vagantibus passim morbis Epidemicis à Medicis pariter fieri deberet, ut ad cohibendam illorum ferociam conferrent quoque omnes, tanto magis si intricati & complicati illi extiterint & ad modum *febrium intermittentium*, de quibus speciatim nunc agere constitutum est, nova indies ac semper fere graviora symptomata formaverint, sicque Hydram quasi Lernæam æmulentur, cujus si capita aliquot resecueris, statim eodem momento totidem renascuntur, adeo, ut altero quasi opus sit Hercule, qui, ut hanc sagittis & igne in palude, sic & illa medicamentis generosioribus & efficacioribus destruat atque remo-

removeat. Hinc in tali malo averruncando Medicos oportet toto die esse occupatos, præprimis cum experientia sæpius testetur illos ὁδραν τέμνειν, h. e. incommodum unum tollere pluribus statim ejus in locum succedentibus, aut Sisyphi saxum volvere & in remotione symptomatum quotidie recrudescentium ut plurimum operam oleumque perdere, nisi pertinacissimos istos affectus tam quoad signa modumque invadendi, quam quoad causas & primam illorum originem exacte indagaverint suamque juxta has circumstantias Therapiam rite adornaverint.

§. III.

Febres igitur generatim sumtas ordinarie ad tres in universum classes, in scholis Medicorum, redigi, notum, imo notissimum est; prima harum est *continuum*, quæ nec intermittunt, nec remittunt, sed uno eodemque gradu per plures dies continuant, donec in totum iterum evanescant; altera est *continuarum*, quæ, licet nunquam plenariam intermissionem habeant, tamen statas & determinatas remissiones similesque exacerbationes exhibent, adeoque interdum ad minimum ægrotantes suos mitius affligunt; tertia denique est *intermittentium*, quæ admodum sensibilia intervalla vacua habent, atque periodice semper desinunt redeuntque, ut patientes interim ad orthostadium qualemcunque redire queant. Hæ autem singulæ ordinarium & consuetum suum typum non semper ita exacte servant & observant, sed sæpius inter se vel complicantur, vel certo respectu deteriorantur, ita ut benigniores & mitiores species typum vel saltem larvam maligniorum & magis acuta-

acutarum febrium assumant, iisque si non quoad omnes circumstantias, tamen ad minimum quoad *oriendi* & *inprimis grassandi modum* sese assimilent, quale quid speciatim in *febris intermittentibus* ordinarie quidem *sporadice*, interdum tamen etiam *epidemice* (prout hactenus quoque passim factum est,) grassantibus atque continuas quodammodo æmulantibus, sæpissime observare licet.

§. IV.

Cum vero ultimam febrium classem, quas vulgo *intermittentes* vocant, præsens hæc Dissertatio maxime respiciat, hinc ante omnia brevibus adhuc notandum esse duco, quod earundem variæ, quoad *tempus exacerbationis*, in Praxi observentur species, vulgatæ pariter ac rariores, frequentes ac infrequentes: Priores constituunt ordinarie *quotidiana* quæ omni die, *tertiana*, quæ tertio semper & *quartana*, quæ quarto die recurrit ac exacerbationes suas format; & hæ sunt etiam illæ species, de quibus proprie hic loci acturus earumque epidemicam grassationem demonstraturus sum: Ad posteriores vero referuntur *quintana*, quam ZAC. LVSTITANVS *Medic. princ. Hist. Lib. IV. Hist. 37. Observ. 732. TVLPIVS Lib. III. Observat. cap. 52. & DETHARDINGIVS in Append. ad Cent. I. & II. Ephemer. N. C. pag. 196. observarunt; sextana*, quam JOS. LANZONI in *M. N. C. Cent. VIII. Obs. X. septena* quam RHODIVS *Cent. I. Obs. 18. descripserunt; octana*, quæ à SALMVTHO *Cent. III. Obs. 13. HAGENDORNIO Cent. II. Hist. 57. pag. 232. RHODIO Cent. I. Obs. 18. SCHVLTZIO in M. N. C. Dec. I. Ann. IV. Observ. 70. recensita prostat; nonana*, de qua
SCHEN-

SCHENCKIUS *Lib. VI. Observ. de febr. varia* allegavit exempla, & *decimana* cujus ZACVTVS LVSIT. *Prax. admir. Lib. III. Obs. 34.* mentionem facit, quas vero omnes & singulas species, velut rarissime occurrentes, & sub hac epidemica grassatione nunquam observatas, merito nunc omittimus.

§. V.

Proinde etiam tales febres intermittentes inter se differunt quoad *typum* atque *recursum paroxysmorum*, qui quidem regulariter simplices tantum sunt & statas suas periodos exacte observant, interdum autem extraordinario modo vel duplicantur, vel (quod tamen rarius evenit,) etiam triplicantur, adeoque irregularem formant typum, febresque ejusdem quidem speciei, sed diversæ indolis sistunt. Sic *quotidianæ* quandoque redduntur irregulares, si nimirum loco unici & simplicis, quolibet die duplicem vel etiam triplicem paroxysmum experiuntur ægrotantes; sic etiam *tertianæ* modo *duplices*, modo *duplicatæ*, pari fere ratione oriuntur, *duplices* nempe, quando tertio quolibet die duo paroxysmi occurrunt, diebus autem intercalaribus ægroti semper iterum ad orthostadium redeunt; *duplicatæ* è contra, quando tertia quavis die unicus quidem paroxysmus accidit, sed simul in intercalaribus diebus recurrit, ita tamen ut non ad modum quotidianarum, omnes tales paroxysmi inter se conveniant, sed tantum tertius primo, quartus secundo & quintus iterum tertio respondeat. Eodem modo res quoque sese habet cum *quartanis* duplicibus pariter ac duplicatis, ubi modo in die exacerbationis, finito vix uno paroxysmo statim alter su-

B

per-

pervenit, & duo dies intercalares dein succedunt, aut quando per duos dies semper febricitant ægrotantes, remanente tantum unico intercalari, & tunc ordinarie primi diei paroxysmo respondet quartus, huic, septimus, &c. qui vero secundo die occurrit, semper quinto, octavo undecimo, &c. recurrit, tertio interim, sexto, nono & duodecimo à febre prorsus liberis existentibus. De *Semitertiana febre* s. *Hemitritæo* quicquam monere haud opus erit, quoniam sub eadem omni die quidem febricitant patientes, sed tertio semper die duplicem experiuntur paroxysmum, adeoque magis ad continuas ea referenda videtur; neque etiam *erraticarum febrium* singularem mentionem nunc injicere lubet, quoniam sub his omnis generis & speciei febres comprehenduntur, quæ ab ordinario typo nimium recedunt, atque speciatim periodos & dies suas destinatas tam quoad recursum, quam quoad durationem prorsus negligunt, adeoque non ad intermittentes solum, sed & ad continuas febres referri possunt, quas tamen cum prioribus hac ratione confundere nec lubet, nec licet.

§. VI.

Tandem etiam, antequam ad recensionem historiarum harum febrium pressius me accingam, probe quoque observandam & commendandam esse duco distinctionem inter febres intermittentes *benignas*, *malignas* & *epidemicas*; licet enim non solum plerique veteres sed & plures recentiores omnem febrem intermittentem, quamprimum illam deprehenderunt, statim ab omni malignitate liberam pronunciaverint, & falso hoc præjudicio decepti, existentiam talium malignarum

rum febrium pleno pernegaverint ore, sicque eas forsitan in praxi occurrentes vel non agnoverint, vel benignarum ad instar tractaverint, eaque propter in ordinario suo prognostico quandoque decepti fuerint; tamen experientia, fide dignis modernorum quorundam autorum observationibus corroborata, aperte testatur, dari quandoque febres ex classe intermittentium, & speciatim ex numero *tertianarum*, quibus, ob conjuncta accidentia benignis ejusdem census febribus alias insventa, deliria nempe, agrypniam pertinacissimam, cardialgiam, vertiginem, convulsiones, &c. merito *malignarum* titulus competat, quemadmodum tales brevibus Celeb. MATTH. BLAW in *Ephemer. Nat. Cur. Dec. III. An. 7. Obs. 58.* & CAROL. RAYGER *Decur. III. Ann. III. Observ. 138.* tam explicite quam implicite delinearunt, fusius autem Excell. D. D. CAMERARIUS in peculiari *Dissertatione de Febre tertiana intermittente maligna*, An. 1692. Tubingæ publice ventilata, & Medici Wratislavienses *Histor. Morb. Wratislaviens. Anni 1702. pag. 134. sqq.* descripserunt, ut propterea de vera ac reali illarum existentia nullum amplius dubium superesse queat.

§. VII.

Quemadmodum autem *intermittentes malignæ* imprimis ab aliis consimilibus speciebus differunt *gravitate* & *acerbitate symptomatum* plane peregrinorum & in reliquis prorsus deficientium; sic è contra *intermittentes epidemicæ* ab his malignis præcipue distinguuntur *modo* & *gradu invadendi*, dum non solum uno eodemque tempore plures homines in una eademque civitate, imò sub uno eodemque tecto degentes afficiun-

tur, sed & in respectu ad malignas, mitiora symptomata inferunt, atque ut plurimum citra periculum tandem decurrunt, nisi aliunde corporis vires jam jam vel ætate, vel à prægresso quodam morbo fractæ fuerint, sicque morti januam aperuerint. Habent enim febres tales epidemice grassantes utique contagium quoddam specificum, licet illud non semper adeo manifeste se prodatur, sed ea propter tamen non statim malignæ sunt, nec malignarum more plurimos suorum ægrotantium extinguunt, quoniam nunquam absolute requiritur, ut omnis morbus epidemicus simul sit malignus, aut quilibet malignus simul semper sit epidemicus, quin possunt potius, uti in his febribus contingit, morbi quidam populares interdum eodem modo à malignitate liberi esse, quo alii exacte maligni quandoque contagio vacant, qui, licet hunc vel illum cum gravissimis symptomatibus, quæ ipsa etiam mors sæpissime excipit, affligant, tamen alios tali tempore plane non inficiunt, sed in subiectis singularibus tantum subsistunt.

§. VIII.

Solent igitur febres nostræ epidemicæ ordinarie omnes indistincte cujuscunque ætatis, sexus & constitutionis homines, nullo prorsus ad hanc ultimam habito respectu, an ea bona, an vero mala sit corripere, imprimis autem illos, qui in eadem domo, eodem contubernio, eodem sæpe lecto utuntur, & quidem ita, ut ad præcavendas illas, purgationes aut V. Snes præservatoriæ institutæ ut plurimum nihil profuerint, quin interdum priores, si paulo fortiores extiterint, febres tales eo magis accelerant, aut jam præsentibus magis exacerbant,

bant, quoniam forsitan extraordinariæ illæ humorum commotiones subjecta ad recipiendum illud contagium seu *μίασμα* febrile aptiora reddiderunt. Antequam autem ægrotantes revera febricitare incipiunt, persentiscunt ordinarie insolitam totius corporis lassitudinem & membrorum gravitatem, agrypniam fere continuam, capitis dolorem gravativum magis quam punctorium aut lancinatorium, unacum spasticis in cervice maxime & scapulis occurrentibus tensionibus, quæ tamen signa non semper & in omnibus occurrunt subjectis, sed in quibusdam, licet rarius, prorsus defecerunt, ita ut derepente & nihil minus metuentes interdum à febribus istis correpta fuerint.

§. IX.

Quod ipsos dein paroxysmos febriles attinet, tales incipiunt ordinarie cum frigore ad unam alteramve horam, raro diutius, durante, ægrosque admodum moleste afficiente, adeoque valde discrepant à paroxysmis aliarum hujus speciei febrium epidemicarum, quorum accessiones cum calore statim, eoque intensissimo, factas, ægrosque in principio rarissime vel nunquam de horrore vel frigore quodam conquestos fuisse referunt WILLISIVS *Lib. de Febris cap. 3.* & MEIBOMIVS in *Dissert. de Febris intermittentibus epidemicis §. 12.* Succedunt dein ut plurimum aut concurrunt, durante adhuc frigore, ructus copiosi, anxii vomendi conatus, quin actuales tandem vomitus, modo pituitosi, modo aquosi, modo biliosi, semper tamen subacidi aut acerbi, satis copiosi & frequentes ægrosque misere simul torquentes, præprimis quoniam, facta excussione saburræ præsentis

biliosæ, aliarumque impuritatum, nihilominus etiam in proximis paroxysmis ægrotantes ad inanem hunc concussorium motum concitantur. Speciatim vero & crebriores & molestiores ordinarie evadunt tales vomitus in tertianis febribus, ita tamen, ut procedente tempore, v. g. post tertium, quartum, vel quintum paroxysmum, mitiores fiant, atque solum in principio caloris subsequenti adhuc occurrant, tandem penitus evanescant, nisi forsitan ob errorem in diæta brevi ante paroxysmum commissum, aut nimiam ventriculi sensibilitatem, de novo redeant, & tunc communiter usque ad morbi finem & exitum durant.

§. X.

De reliquis symptomatibus non opus erit, ut multa adducam, quoniam horum intuitu febres hæ epidemicæ parum vel nihil ab ordinariis intermittentibus discrepant, nisi quod singula illa hoc tempore plerumque paulò acerbiora extiterint, ipsæque febres facilius, quam alias, in continuarum typum inclanaverint, id quod inprimis ex eo admodum manifeste apparebat, quoniam consuetum suum tempus exacerbationis sæpissime ad duas pluresve horas anticipabant, æstuque longe graviore ac diuturniore, quam quidem ordinarie observatur, affligebant, ita, ut etiam vacuis diebus perfecta ne quidem persentisceretur *ἀπυρεξία*, sed semper calor quidam præternaturalis & pulsus justo frequentior, usque ad novi cujusdam paroxysmi accessum, remaneret.

§. XI.

Inprimis autem ægri sub qualibet statim invasione

ne

ne de nulla re magis conqueruntur, quam de cardialgia admodum molesta, ipsos dolore modo gravativo & pressorio, modo tensorio & spastico, modo etiam urente ac rosivo, affligente, qui quidem post unum alterumve vomitum in tantum remittere, rarius autem vel nunquam plane & in totum iterum evanescere, sed superatis jam jam paroxysmis in ipsis diebus vacuis, præprimis post assumptum levissimum cibum indefinenter continuare, aut post brevissima intervalla redire assolet. Proinde concurrit etiam, sub æstu maxime, capitis dolor, modo levior & saltem obtusus atque gravativus, modo vehementior, acutus & pulsabilis, imo sæpe adeo immanis, ut nullis remediis cedens, per totum exacerbationis tempus ægros miserrime excruciet, atque non unam semper, sed varias subinde capitis regiones affligat; cessante autem paroxysmo plerumque iterum remittit, & extra illum rarius recurrit, nisi interdum horis matutinis, aut post assumptum qualemcunque cibum. Adsunt porro etiam vigiliæ & agrypniæ, præprimis in subjectis junioribus, quæ ut plurimum noctes dierum exacerbationis magis turbulentas & insomnes experiuntur, quam dierum intermissionis. In quartanis autem, adultiora præcipue aut magis senilia corpora affligentibus, non tam de nimiis ejusmodi vigiliis ægrotantes conqueruntur, quam potius de somnolentia mox cum paroxysmis ingruente, viresque ob turbulentam suam indolem magis dejiciente, quam restaurante, nec unquam prius, nisi post plenarie finitum paroxysmum, iterum cedente, interdum vero in blandum somnum, qui semper melior est

est, & sudorem, insolitum quidem in hac febrium specie, sed ægrotis admodum proficuum eosque eximie sublevantem, desinente.

§. XII.

Præterea persentiscunt etiam ægrotantes dolorem molestum spasticum & tensivum, qui plerumque à nucha incipiens & deorsum protensus, totam spinæ dorsalis longitudinem graviter afficit, quin imo in ipsos etiam artus, pedes imprimis & suras, excurrit, atque tam sub frigore, quam etiam remittente æstu, atrociori semper gradu sese exserit. Tandem occurrit quoque in plurimis febricitantibus, maxime sub initium cujuslibet paroxysmi, sapor quidam summe adversus & nauseosus, qui diu interdum durat, & non raro post febres jam jam perfecte superatas adhuc pertinaciter, non sine metu recidivæ, continuat, donec tandem post diuturniorem moram successive iterum evanescat. De reliquis autem symptomatibus, nempe alvi modo adstrictione, modo insolita fluiditate, oris nimia siccitate, siti ferè intolerabili, &c. nihil jam dicam, quoniam notissima sunt, atque eadem prorsus ratione, qua in aliis intermittentibus febribus ordinarie occurrunt, etiam his epidemicis solennia fuerunt. Sic etiam de *typis* harum febrium nihil plane ulterius monendum habeo, nisi, quod, ut supra dictum est, plerunque quotidianas & tertianas, hasque tam simplices quam duplices & duplicatas, interdum etiam quartanas sistant, atque hæ ultimæ haud raro in tertianas plenarie abeant, vel ad minimum plurima earundem symptomata & universum quasi genium assumant, & quidem citra ullum
vel

vel indiæta ab ægro, vel circa therapiam à Medico commissum errorem; quæ tamen omnia nihil impediunt, quo minus tales febres etiam tunc eadem cum pertinacia, qua alias solent, pariter continuent, atque non nisi post plurium hebdomadum decursum & satis heroicorum remediorum usum perfecte iterum profligari queant.

SECTIO II.

ÆTIOLOGIAM ET PROGNOSIN HARUM FEBRIVM EXHIBET.

§. I.

TRaditis nunc *signis* ad *historiam* harum febrium præcipue spectantibus, ordinis & instituti ratio nunc postulat, ut ad enumerationem *causarum* progrediar, & genuinam illarum originem, secundum fundamenta pathologica, nunc eruere annitar; non quidem omnia, quæ de febribus intermittentibus in genere dici possunt, atque in vulgus fere jam cognita sunt adducendo, sed solummodo, quæ *epidemicis* hisce magis solennia & peculiariora sunt, iusto ordine atque concinna brevitæ exhibendo. Non immerito autem statim inter initia hujus tractationis movebitur quæstio, an hæ febres, aliàs semper inter benigniores relatæ, ad modum aliorum malignorum morborum, itidem *contagiosæ* sint, quoniam, si contagio carent, vix concipi posset, qua ratione tales *epidemicæ* fieri queant? De ultimo enim hoc asserto nemo fortasse dubitabit, quoniam experientia aliena pariter ac propria

C

no-

nostra illud jam fatis manifestum reddidit atque sæpius confirmavit, siquidem Celeb. SENNERTVS *Lib. II. de Febr. cap. 20.* speciatim *quartanas* describit febres, quæ Anno 1616. toti Germaniæ fuerint epidemicæ, & Wittebergæ inprimis adeo familiares, ut etiam modo natos corripuerint infantes, & vix domus aliqua extiterit, in qua non quartanarius, modo unicus, modo plures decumberent. Sic etiam Excell. MEIBOMIVS in *Diff. alleg.* non solum *febres intermittentes* An. 1678. passim Germaniam epidemicè affligentes accuratissime describit, sed & §. 8. *tertianarum epidemicarum* mentionem facit, quæ An. 1666. *Gvelferbyti* inprimis plus quam dimidiam partem hominum corripuere, quales etiam Celeb. GRÜNDELIVS in *M.N.C. Decur. II. An. VI. Obs. 148.* recenset, quod Anno 1687. per totam Stiriam adeo grassatæ fuerint, ut solummodo in Metropoli Grætz, ex quatuor mille ægrotantibus, qui tunc simul in unico mense decumbebant, *plurimi* similibus febribus, pauci continuis & paucissimi aliis morbis laboraverint. Taceo intermittentes itidem hoc anno à Martio Mense ad hunc usque diem passim in Germania epidemicè grassantes, quippe quæ occasionem præcipuam mihi suppeditarunt, ut, quæ de illarum natura & curandi ratione hætenus observare licuit, nunc loco inauguralis Dissertationis exponere decreverim.

§. II.

Quod vero intermittentes febres interdum quoque *contagiosæ* sint aut fieri queant, hætenus quidem paucissimi credere, atque idcirco etiam ægrotos ab iis correptos pariter, ut in aliis morbis per contagium sese com-

communicantibus fieri solet, vitare noluerunt; sed experientia itidem exacte demonstravit, quod revera etiam in his tale adsit contagium, licet illud non semper æque manifesto sese prodatur, nec propterea adeo prompte inficiant tales febres, quam quidem pestilentes & aliæ malignæ faciunt. Testantur enim supra citati Auctores, quod sub epidemica ista grassatione, ii in primis statim à febribus istis intermittentibus correpti fuerint, qui ægrotis ministrarunt & propius cum ipsis commercium habuerunt, quale quid etiam hoc nostro tempore ab iisdem febribus, quas hætenus descripsi, passim factum est, ut propterea non immerito cum Celeb. NEVCRA NTZIO in *Tr. de Purpura cap. V. pag. 54.* febres intermittentes tunc demum semper propriam contagii essentiam conjunctam gerere sentiam, quando nimirum *Epidemicæ* factæ sunt.

§. III.

Eo ipso vero, dum febres hæc *contagiosas* esse demonstro, non lubet insimul asserere, quod & insuper *malignæ* sint. Etenim *malignum esse & contagiosum esse* non semper simul uni eidemque speciei febrium competit, nec in omnibus conjunctim occurrit, sed secundum diversitatem circumstantiarum, maxime tempestatis & anni temporum, modo hoc, modo illud adest pariter ac abest; sic in malignis petechialibus, quando epidemice non grassantur, sæpissime nullum prorsus contagium observatur, licet cum gravissimis symptomatibus ægrotantes affligant; sic etiam gravissimæ lethalesque alias dysentericæ itidem non omni tempore contagiosæ observatæ fuerunt, sed sæpissime tantum

sporadice grassari observantur, licet illæ haud postremum in classe malignarum febrium obtineant locum. Pari quoque ratione res sese habet cum intermittentibus epidemicis, quæ tunc quidem, quando ita grassantur, utique simul *contagiosæ*, minime vero propterea semper *malignæ* existunt; interim tamen haud nego, quod dentur etiam *febres intermittentes malignæ*, satis periculosæ à specifico tamen *contagio* liberæ, quarum historias Doctiss. MORÆVS magno numero in peculiari tractatu congeffit, quibusque propterea accenseri merentur observationes Celeb. SCHWALLERI in *M. N. C. Decur. III. An. V. & VI. pag. 118.* ZACVTI LVSITANI in *Histor. Med. Princ. Lib. IV. Hist. 30. pag. 717.* ut & singulæ illæ, quæ jam in §. VI. Sect. I. hujus Dissert. recensitæ prostant; sed de iis hic loci fusius agere non placet, quoniam tantum intermittentes benignas, quæ certis typis, manifesta & evidenti ἀπυρεξία ægrotantes affligunt, specialius pertractare constitutum est.

§. IV.

Harum igitur primariam & principalem causam constituit ordinarie *πύρεμα* quoddam specificum, subtile & fermentativum ab aere, cujus diversæ qualitates illud quoque diversimode alterare solent, corpori ejusque humoribus communicatum, quod dein principium nostrum vitale, tanquam peregrinum & ad dissolutionem mixtionis partium tam fluidarum quam solidarum valde pronum subiectum, extraordinariis istis motuum febrilium gradibus iterum remove atque ejicere tentat. Peraeris enim anomalias magnasque tempestatum mutationes etiam corpus nostrum & humores

mores in ipso contentos magnas insimul pati alterationes ac sensim sensimque ad varii generis morbos disponi, manifestissimum est; tanto magis autem tale quid evenire potest, si in aere insimul principia multa halitua & orgastica ad excitandum motum fermentativo-putrefactorium maxime disposita continentur & successive singulis corporis nostri partibus communicantur.

§. V.

Hanc ipsam vero nostram sententiam de miasmate quodam singulari febres tales præcipue excitante, demonstrant atque corroborant maxime sequentes ex ipsarum historia depromptæ circumstantiæ; quod nimirum 1) ingens illorum hominum occurrat numerus, qui tempore talis Epidemicæ constitutionis toti sani, nullumque insolitum pathema antea experti, derepente febribus hisce corripuntur, quale quid alias contingere haud posset, nisi extrinsecus quicquam communicatum & intra corpus sanissimum receptum esset, quod ejus œconomiam ita vehementer perturbare valet; quod dein 2) frequentissime tam in primo febris accessu, quam declinatione, circa labia aut nares in ægrotantibus pustulæ quædam & exulcerationes superficiales erumpant, quibus febres istæ ut plurimum vel perfecte solvuntur, vel notabiliter saltem imminuuntur, evidenti sane testimonio, quod fermentum istud peregrinum, sanguinem hætenus turbans, in partibus mollioribus nunc erumpat & acrimonia sua ibidem erosionem quandam producat pustulasque in labiis excitet, & sic consequenter facta ejusdem exterminatione omnia iterum

iterum aboliantur symptomata & pristina redeat sanitas; 3) quoniam ipsa experientia aperte testatur, quod ejusmodi febres non solum ab aere impuro atque paulustri facillime excitari, sed & mutatione aeris iterum profligari queant, confirmantibus id ipsum observationibus in *M. N. C. Dec. II. An. VII. pag. 414. & Dec. III. An. VII. & VIII. pag. 39.* 4) quoniam singula illa medicamenta, quæ alias maligna miasmata in febribus epidemicis ex massa humorum eliminant, diapnoica nempe & alexipharmaca, quin ipsa interdum vesicatoria, majorem semper utilitatem afferunt, quam reliqua in febribus intermittentibus alias solennia evacuantia, tam emetica quam cathartica, quod evidentissimum sane est testimonium latitantis magis intra humores, quam in primis viis, adeoque magis ab aere, quam aliunde communicati cujusdam miasmatis specifici.

§. VI.

Quod causas antecedentes atque iniquam & pravam istam constitutionem aeri conciliantes attinet, primum utique jure meritoque inter illas tenet *tepidior hyemis constitutio*, quæ impedit, quo minus exhalationes tempore æstivo & autumnali copiosius è sentinis, paludibus & cœnosis specubus ascendentes, atque diutius in aere obhærescentes atque oberrantes, mediante frigore acerbiori quadantenus corrigi aut penitus iterum inde auferri queant; hinc succedente calore vernali tales dein non solum in perniciofa sua activitate magis exaltantur, atque ob auctiorem in corporibus humanis tunc succedentem transpirationem simul commodissimam nanciscuntur occasionem, per subtilissimos cutis poros

poros aliasque vias insensibiles sese successive M. Seæ insinuandi atque insigniores istas turbas in eadem excitandi. Ejusdem activitatis sunt quoque *procellæ* & impetuosiores ventosæ tempestates, quibus è longinquo interdum asportatur ejusmodi perniciosum miasma atque aer noster atmosphæricus perversa quadam aura inquinatur. Nec omittenda etiam est *pluviosa aeris constitutio* & frequentiores *nebulae*, quæ non solum illum ad diutius retinendum tale miasma magis disponunt, sed & majorem humorum cacochymiam producunt, sicque viam faciliorem pro introducendis molestissimis hisce febribus pandunt. An vero etiam *nimia fertilitas terræ*, prout juxta Celeb. GRÜNDELI relationem in M. N. C. Dec. II. Ao. VI. Obs. 148. de similibus febribus Ao. 1687. in Stiria grassantibus quidam crediderunt, inprimis autem Bachi liberalitas ac nimia vini abundantia, & quæ immediate hanc excipit, copiosior ejusdem ingestio, quicquam ad producendas has febres contribuat non quidem ita absolute asserendum, sed insimul etiam minime in totum negandum esse censeo. Interim reliquas ordinarias febrium intermittentium causas hic loci minime excludo, utpote quæ præter hætenus recensitas suum quoque ad excitandas tales febres epidemicas conferunt symbolum; quoniam vero illæ ad nauseam fere jamjam cognitæ sunt, hinc lubens nunc specialiori earum recensione supersedeo.

§. VII.

In *Prognosi* equidem inexperti ab his febribus communiter propter vehementiora illarum symptomata & diuturniores paroxysmos, multum periculi metuunt, sed

sed periti Medici in eo cum ipsis haud consentiunt, probe nempe gnari, quod omnes febres, quæ ἀπυρεξίαν veram habent, minus periculosæ sint continuis atque malignis. Hoc tamen non obstante utique sæpius contingit, ut alios quoque morbos inducant hæ febres, quæ interdum etiam lethales fiunt, idque partim ob malam constitutionem & nimis depravatam humorum diathesin in ægrotantibus, vel ob eorundem errores & immerigeram indolem, vel denique ob ipsam medicantium culpam, quando nempe illi specificis & febrifugis suis paroxysmos quocunque tantum modo, citra prægressam miasmatis peregrini exterminationem, sistunt; tunc enim tales febres ordinarie vel Cachexiam, vel Scorbutum, vel Hæcticam, vel Hydropem aliaque plura fontica mala post se relinquunt, id quod sæpissime etiam accidit, si nimis diu toleratæ & habituales jamjam redditæ fuerunt, quippe quæ tandem, nisi convenienter removeantur, in similes funestos affectus desinunt.

SECTIO III.

THERAPIAM HARVM FEBRIVM SISTIT.

§. I.

Quoniam per experientiam satis jamjam liquet, quod febres intermittentes in genere si sibi relinquuntur, atque homines de cætero sanos adorian-
 t, rarissime lethales evadant, sed sæpius sua sponte, post aliquot dierum intervallum iterum desinant, imo quoniam & nostræ epidemicæ simili fere modo sese gesserunt, atque ratione eventus sic satis benignas
 sese

sese exhibuerunt, hinc non immerito feliciores judico illos ægrotantes, qui nullo prorsus Medico utuntur, præ illis, qui in manus imperiti incidunt Empirici, qui omissa consideratione constitutionis subjectorum, nullaque habita ratione motuum salutarium Naturæ contra noxiam extranei istius fermenti activitatem directorum, unice medicamentis suis ita dictis antifebrilibus contra paroxysmum pugnant atque hoc sublato, febres quoque rite curatas esse sibi imaginantur : Sunt enim hæ Febres nil nisi *complexus motuum auctiorum se & excretoriorum, modo singulis diebus, modo etiam tertio aut quarto quovis die sese exacerbantium, quibuscum Natura partim peregrinum quoddam in M. S. oberrans ejusque mixtionem valde depravans miasma, partim etiam materiam quandam mucidam & viscidam circa primas vias hærentem, debite corrigere & successive iterum eliminare intendit; & hinc apparet, quod tanto minus consultum sit, illas ita temere opprimere & suppressere velle, nisi antea salutari huic intentioni Naturæ in omnibus satisfactum fuisse liquidò appareat.*

§. II.

Quo igitur Theoriæ harum febrium hætenus propositæ *Therapia* debite accommodetur, methodusque conveniens easdem cito pariter ac tuto profligandi eo facilius adornetur, sequentes in primis *Indicationes* eidem fundamenti loco substernendas esse judico : I.) *Ut miasma peregrinum humoribus communicatum quantocyus in noxia sua activitate infringatur, corrigatur, & quantum possibile est, removeatur; II.) Ut Materia in primis viis obhærescens debite abstergatur; III.) Ut symptomata urgen-*

tio-

riora mitigentur & motus febriles excedentes temperentur.

§. III.

Quoad primam indicationem utique opus est, ut statim in initiis harum febrium per convenientia medicamina fermenti istius subtilioris *ἐνέργεια* tollatur, illudque ita præparetur, ut postmodum tanto facilius majorique cum *ευφροία* penitus evacuari queat; faciunt hoc inprimis absorbentia teneriora cum acidis saturata & cum diapnoicis fixis atque Æibis mediis maritata, & vel diebus vacuis, vel ante novi paroxysmi accessum propinata, v. g. R. Oc. $\overline{\omega}$ citrat. Matr. perl. ppt. $\frac{1}{2}$ ii diaph. ana zi. Arcan. dupl. $\frac{1}{2}$ i $\overline{\omega}$ lat. ana $\frac{1}{2}$ ij. Æis Absynth. $\frac{1}{2}$ j. M. F. pulvis div. in xiiij. p. æ. D. S. Corrig. *inde Sieber = Pulver, davon vor dem Paroxysmo alle 3. Stun. n. eins, oder auf den guten Tag allezeit 3. mit Bier zu nehmen.* Similem virtutem habent etiam Infusa vinosa ex antiscorbuticis, amaris ac resolventibus præparata, præprimis in quartanis, eodem modo exhibenda, interposita simul una alterave dosi priorum pulverum circa vesperam dierum vacuorum. Nec omittendæ etiam sunt, maxime in subjectis serosioribus Mixturæ ex TRa $\frac{1}{2}$ i Eff. Succin. Gent. r. Pimp. alb. bis per diem ad gtt. xxxvj. propinanda. Exclusionem autem miasmatis subtilioris præ omnibus aliis facillime & optime adjuvant diapnoica & temperata alexipharmaca, quippe quorum effectus in his febrium speciebus nunquam non exoptatissimus fuit, quoniam ipsa experientia abunde jam docuit, quod continuantibus & in ipsis diebus vacuis sponte ac satis copiose prorumpentibus sudoribus ægroti semper melius se se habuerint, quam sub eorum defectu. Exhibenda autem sunt ejusmodi alexipharmaca, sub quibus speciatim Eff. alexiph. Halens. TRam bezoard. Wed. sine camph. nec non TRam bez. Mich. it. potiones cum pulveribus ex diaphoreticis fixis paratas intelligimus, circa finem paroxysmorum & sub vesperam dierum exacerbationis, tunc enim sanguinem

nem non nimium commovent, & tamen quicquid in eo est heterogenei fermenti, egregie expellunt. V. Sio pro obtinendo hoc fine non æque absolute necessaria est, quoniam per eam minor tantum hujus fermenti quantitas excludi potest, & quidem modo quodam prorsus inadæquato; interim tamen propterea non penitus rejicienda, sed interdum ad minimum præservatorie administranda est, si nimirum corpora sint juvenilia, plethorica & calidioris constitutionis, quoniam suborientem alias sanguinis orgasmum tanto certius præcavet, ac exclusionem fermenti postmodum eo magis faciliat.

§. IV.

Secundam indicationem præ reliquis commodissime absolvent digestiva & abstergentia, maxime autem Θia media amara, in pulveribus, absque terreorum & absorbentium admixtione, itidem in diebus vacuis, una alterave hora ante vel post pastum exhibenda, interpositis simul Essentiis stomachicis amaris, aut Infusis antiscorbuticis supra allegatis. Purgantium autem & vomitoriorum usum indiscretum penitus dissuademus, quoniam ob insignem humorum commotionem, quam ordinarie excitant, simul fermenti istius subtilioris ἐνέργειαν exaltant, febresque deteriores magis reddunt; prostant enim exempla sat numerosa illorum, qui licet valide purgaverint & bilem ac pituitam in notabili copia rejecerint, tamen postmodum febres non solum eadem aut majori symptomatum vehementia redeunt, sed & interdum paroxysmos suos duplicantes, experti fuerunt. Hinc, si nimia impuritatum in primis viis collectarum saburra ejusmodi artificiales excretionem absolute requirat, per temperatiora potius quam drastica hujus generis medicamenta illas instituere consultum duco, atque sic quidem hoc nomine vel Ψum Emet. Myns. correct. ad gr. ij. vel pulv. laxativum vegetab. Wed. aut Θ Epsom. diebus intermediis exhiberi poterunt.

§. V.

Quod tertiam attinet indicationem, ea inprimis nimios illos

illos sed sæpissime vanos & vacuos vomitus spontaneos, nimiumque æstum concernit, quoniam hæcce symptoma-
ta præ omnibus aliis ægros ordinarie vehementissime affligunt, & ad reliquorum exacerbationem principalem occasionem suppeditant. Ad vomitus igitur compescen-
dos & mitigandos, si tales ultra modum continuent nihil-
que prorsus exturbent, præter pulveres digestivos ante pa-
roxyssimum aliquoties exhibendos, optime conducunt Cort.
Cascar. Spec. de Hyacinth. Corall. r. præpar. & Crysell. mont.
præparat. in pulvere, nec non Ess. Gent. rubr. Cort. Oant.
Cascar. TRA Oli ætis Ludov. Ess. Abs. Comp. & c. in Mixturis
tam sub paroxyssimo, frigoris tempore, quam in diebus vacuis
propinandæ, cavendo insimul, ne ægri tunc potulenta vel
nimis frigida, vel nimis etiam copiosa ingerant. Æstum au-
tem impetuosiores mitigant omnia acidulata, inprimis
Ætus minerales potulentis instillandi, Lapis Prunellæ
cum pulveribus temperantibus, & Syrupi aciduli cum po-
tionibus ejusdem virtutis combinandi, nec non MRa simpl.
sine camph. ad gtt. xxx. vel xl. interdum interponenda.
Quodsi autem post usum omnium horum remediorum,
atque peractam sufficientem miasmatis peregrini evacua-
tionem, motus isti febriles nihilominus pertinaciter con-
tinuaverint, tunc licet ad secura *Febri fuga* properare, quo-
rum specialiozem enumerationem, ob chartæ angustiam
& quia talia sufficienter jam jam cognita sunt, lubens nunc
omitto, & unicum saltem hoc commendo, ut post illorum
usum alexipharmaca, digestiva atque stomachica adhuc
per aliquot dies continuentur, tandem laxatio moderata
aliquoties instituenda subjungatur, ægri à nimia ciborum in-
gurgitatione arceantur, & quantum possibile est, ad regula-
ris diætæ observationem adstringantur; quippe quæ
sola fere optimam præbet harum febrium
medicinam.

T A N T V M.

S. D. G.